



VERSCHNUUFFER

www.verschnuuffer.ch

FASNACHT 2015

FLUG-PLATZ-LUFT DUSS:

EAP BALD PASSE?

« Les jeux sont faits », so heert me saage,
em Euro-Airport goot s an Kraage.
Der François Hollande haig beschlosse,
der Schwyzer Sektor wurd gschlosse.
Das isch kai «Farce» oder Trick
ihm goot s ganz aifach um e «Fric».
Und s Resultat isch rächt fatal:
S droot: « Aadie Airport Mulhouse-Bâle.»

Uf d Reaggzioon muesch nid lang warte
vo däne Airlines, wo no starte
ab EAP, das sin nimm vuy!,
und s schrumpfe laufend d Reiseziel.
S het voor em Franze Styrrächt Schiss
und sait «Adieu» die schlau Swiss.
Der Lufthansli macht nid der Max
und schiggt sy «Farewell» grad per Fax.

S wott Easy-Chat nimm investiere
duet d Ussbauplän sofort sistiere.
S git Hunderti vo Arbeitsloose,
wo kurzer Hand in d Reere bloose.
Die ganzi Regio isch «choquée»
und mecht die Plän sofort «bloquer».
Bim EAP isch d Luft jetzt duss,
gib gschwind dr letschi Abschiedskuss!

Me wott däm «Con» dr Marsch go bloose,
do heersch dr «Président», die Hoose:
S syg « dommage », är syg « désolé »,
wie haig au das nur kenne gsche?
Und : «Honni soit, qui mal y pense ! »,
dä Riiseblödsinn macht kai «Sense».
Är gäb ys gärn au wider d Hand
und well nur s Beschti – fir SY Land.

Mir tien is mit der France schwär:
S sin d Schnuure voll und d Kasse läär.
S isch finanziell das Land scho toot,
bevoor dä tolli Präsi goot.
S isch d «Grande Nation» nuur no Fassaade,
s goot hindenaabe mit däm Laade.
Do kunnt dr EAP grad glääge,
die guet Finanzlaag isch e Sääge.

S sin «Contrats», «Amitié» egal
und s «Raisonnement» isch ehnder schal.
Die ganzi Regio isch sich ainig
und fir ai Mool gar glyycher Mainig:
S bruucht Diplomaate und au Gricht,
sunscht macht dä ganzi Laade dicht.
Em «Roi Soleil» isch das rächt Wurscht,
är het jetzt aifach schaurig Durscht.

Doch ebber frait das dumm Getue:
Der Rambass het denn ändlig Rue,
kai Fluglärm wird iin denn me steere
wenn är sich in sym Näscht duet keere!
«No solle halt die Wichtigbutze
der Airport Klote besser nutze.
Dert wurd der Fluglärm wenig steere
wenn s Züritütsch nimm so kasch heere».

Vuy! schlimmer ka s jo gar nimm koo!
Denn het är ys no s Elsass gnoot!
Was durch das «Cerveau» duure goot
woorschyyynlig in de Stärne stoot!
Drum heersch ys «Je suis Waggis» riefe
us «Solidarité», der tiefe.
Das Ganze isch e «Pet-Idée»
das muess der Hollande au ygsee.

Am Schluss länggt är drum doch no yy
und loot der Airport so lo syy.
Kuum hesch dr Schaade kunnt dr Spott.
Das gscheet däm Rächt, wo numme wott
gschwind profitiere fir sy «Poche»
drum gheert däm zinfing ains in d «Cloche».
Und unter physisch hartem Drugg,
git är ys vilicht s Elsass zrugg!

Au unseri Ladäärne kaasch vom Määntig z'Nacht bis am
Mittwoch am Morge uff em Minschterplatz bestuune.

Bisch e Kind, mechtsch Fasnacht mache,
denn git's kaini halbe Sache!
So schrib denn unseri Obfrau aa
und mäld Di gschwind zem Yyschtoo aa.

Yneluege: Samschtig 21.03.2015
14.00-16.00 Uhr im Cliquekäller an dr Malzgasse 9 in Basel

Mir fraie uns uf Di!

Fir Informatione mäldsch Di bi dr Obfrau:
Salomé Hug-Meier, Verschnuuffer Gnepf, Malzgasse 9,
4052 Basel, email: gnepf@verschnuuffer.ch